



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

26. Kalenderwoche – ab 28. Juni 2009

In der Stadt Chemnitz ist eine heiße Debatte um die neueste City-Marketingkampagne mit dem Schriftzug „Chmeindz“ entbrannt. Taschen und T-Shirts sollten damit bedruckt werden. Sachsenmeyer hat seine eigene Meinung zu den Dingen.

Chmeindz

Isch begreif das widdor ma nisch – da machn die also vom Siddymargeding eene Werbegambansche, un wo die dann ferschn is, räschn sich fasd alle driebor off. Isch meene jedzde die Gambansche mid die Die-Schirds un Daschn, wo „Chmeindz“ droffschdehn dud.

Die vom Siddymargeding dun mir ja nu schon fasd leid... die kenn eischendlich machen, wasse wolln... es wird gemeggord.

Ja, isch hab ooch gemeggord. Isch hab ibor dähn Wärbeschlogenn gemeggord – „Gemnidz – Schdadt dor Moderne“. Un da du isch ooch heide noch driebor meggorn. Weil isch einfach nisch glohm kann, dass mor sich als Gemnidz werglisch in de Brusd schmeißen kann, die Schdadt dor Moderne zu sein. Isch gloobe, da gibbds anre!

Angemessn däde villeischd sein... - Gemnidz, die Schdadt die ooch e bißl was von dor Moderne abgekrischd had. Abor lass mor das ma jedzde. Dor scheensde Wärbeschlogenn nidzd nischd, wenn sobiso keenor komm dud. Isch meene jedzde - Durisdn, Besuchor, Gäsde! Die komm nähmlisch nisch weschn een Schlogenn! Durisdn komm in eene Schdadt, wenn da was is, was indressand is. Wenn da was is, was hisdorischn is. Odor sonsdwie vorbliffend. Nee, da hads Gemnidz ehm werglisch nisch leischd – un das, was an Gemnidz werglisch indressand is... so hisdorischn... das mid dähr Indusdrie un Hardmann un so... geschn e aldes Schloss un eim gohdischn Dom is das ehm

ziehmlich bescheidn. Abor Bescheidnheid dud sisch manschma ooch auszahln. Isch meene, Döme un Schlössor sinn in Deuschland ooch nischd grade sähr seldn. Vileischd däde dageschn „Rußgemnidz“ was Besonderes sein. Mor muss sei Alleinschdellungsmergmal finden, nisch erfindn! Sachd meine Gudste! Un die muss so was wissn! Un nu also „Chmeindz“!

Währ soll denne eischendlich die Die-Schirds anzieh'n? Fiehr wähn sinn die denne gedachd? Dass die e Durisd anzieh'n dud, dähr sisch nach Gemnidz vorloofn dud, is nisch anzunemm. Heeschdens dud dähr sisch so e Die-Schird odor so eene Dasche dann als Andenk'n midnemm. Warum nisch? Chmeindz! Off alle Fälle - de Schdadtfiehror kenn die Die-Schirds anzieh'n. Isch däde das jedenfalls – wenn isch in Gemnidz Durisd sein däde - ganz luschdisch findn.

De Gemnidzor Birschor...? Hm, also... e Benkor odor e Bollezisd... nee, das däde bleede aussähn! Abor bei normale Leide... isch hab schon viel bleedore Die-Schirds gesähn. Da warn Schbrische droff... Schbrische!!! Un de Leide ham sisch nisch geschäm'd!

Nee, jedzd muss isch ährlisch geschdehn... - mir dud das gefalln – Chmeindz! Das is doch ma eene Idee! Da wird nisch so gedahn, als wie wenn Gemnidz was ganz was Dolles is - odor dor Nabl von Deuschland... - nee, Gemnidz - das is meins - basda!

E kleenes Wordschbiel... odor Buchschdabnschbiel...! Mei Gemnidz – Chmeindz! Isch gloobe, isch koof mir so e Die-Schird! Un meine Gudste krischd so eene Dasche!

Eduard Sachsenmeyer